

PRIVREMENE PREPORUKE ZA SPRJEČAVANJE ZARAZE BOLEŠĆU COVID- 19 U DJELATNOSTI DJEČJIH IGRAONICA I ROĐENDAONICA

Opšte preporuke

Pojačana lična higijena. Treba izbjegavati dodirivanje usta, nosa, očiju i lica rukama.

Higijena ruku. Prije i nakon svake aktivnosti, sva djeca kao i zaposleni, moraju dezinfikovati ruke. Dezinfekciju ruku potrebno je obavljati u redovnim vremenskim razmacima ako se radi o aktivnostima koje duže traju.

Na samom ulazu prostor te u unutrašnjosti objekta, na lako dostupnim mjestima, treba postaviti dozatore sa dezinfekcijskim sredstvom na bazi 70-postotnog alkohola radi dezinfekcije ruku ili drugog sredstva prikladnog za korištenje na koži sa jasno deklariranim virucidnim djelovanjem.

Fizička udaljenost. Za svo vrijeme trajanja aktivnosti, uključujući dolazak, pripremu i odlazak grupa djece i gostiju, preporučuje se održavati fizičku distancu od 2 metra. Razmak podrazumijeva međusobni razmak svih prisutnih zaposlenih i korisnika / gostiju. Ako aktivnost podrazumijeva intenzivno kretanje ili igru u potpunom prostoru objekta predlaže se ograničavanje broja prisutnih osoba prema površini objekta (1 osoba na 10 m²).

Dezinficijens. Sredstvo za dezinfekciju potrebno je u količini od 1 do 2 ml nanijeti na suve i čiste dlanove. Dlanove i područje između prstiju potrebno je protrljati dok se ne osuše, a sredstvo nije potrebno isprati. Potrebno je voditi brigu o pravilnoj upotrebi dezinficijensa za ruke kao i da je uvijek u svim dozatorima dostupna adekvatna količina dezinficijensa.

Kašljanje/kijanje. Kod kašljanja i kijanja prekrivaju se usta i nos laktom ili papirnom maramicom koju poslije treba odbaciti u kantu za otpad s poklopcem te dezinfikovati ili oprati ruke. Pri kašljanju i kijanju treba okrenuti lice od drugih osoba.

Posude. Čaše, drugo posuđe i druge predmete ne treba dijeliti s drugim osobama.

Maske za lice. Zaposlenima se preporučuje korištenje medicinskih maski ili maski za lice. Djeca ne nose maske.

Dnevno mjerenje tjelesne temperature. Zaposleni trebaju prije dolaska na posao izmjeriti tjelesnu temperaturu. Ako je tjelesna temperatura viša od 37,2 °C u jutarnjim satima, ako se osoba osjeća bolesno ili ima bilo koje znakove bolesti (odnosi se na sve simptome i znakove bolesti, ne samo na bolesti respiratornih puteva), treba se javiti nadređenom i ne dolaziti na posao dok se telefonski ne javi izabranom ljekaru.

Evidencija. Za boravak u prostorima igraonica potrebno je uspostaviti sistem vođenja evidencije (podaci o zaposlenicima i gostima i eventualno ostalim osobama potrebnim za odvijanje aktivnosti) radi lakšeg naknadnog epidemiološkog praćenja kontakata u slučaju pojave zaraze virusom SARS-CoV-2. Evidencija treba da sadrži ime, prezime i broj telefona.

Specifične preporuke za zaposlene i roditelje

Rad s djecom. Iako treba očekivati da će kod sprovođenja preporuka dolaziti do određenih odstupanja uslijed razvojnih odlika pojedinih uzrasta djece, tokom aktivnosti dječjih grupa u raznim kreativno-edukativnim sadržajima ili igrama posebnu pažnju obratiti na održavanje fizičke udaljenosti koliko god je to moguće kako bi se što više smanjila mogućnost i rizik prenošenja virusa.

Broj djece u grupi. Broj djece u grupi treba prilagoditi veličini prostora kako bi se nesmetano mogli pridržavati fizičke distance od 2 metra koliko god je to moguće.

Primopredaja djece. Roditelji dovode i odvođe djecu u igraonicu tako da, ako je ikako moguće, ne ulaze u objekat osim u krajnjoj potrebi, već dolaze do ulaza pri čemu zadržavaju distancu od najmanje 2 metra u odnosu na druge roditelje i djecu. Zaposlena osoba preuzima dijete ili ga predaje roditelju ispred ulaza u ustanovu. Djeca se nikada ne ostavljaju bez nadzora.

Bolesni roditelji. Roditelji ne smiju dovođiti niti odvođiti djecu iz igraonica i/ili ulaziti u vanjski otvoreni prostor igraonice (dvorište) ako imaju povišenu tjelesnu temperaturu, respiratorne simptome poput kašlja i kratkog daha ili su pod sumnjom da bi mogli biti inficirani sa COVID-19.

Bolesna djeca. Djeca koja imaju povišenu tjelesnu temperaturu, respiratorne simptome poput kašlja i kratkog daha ili koja su pod rizikom da su mogli biti u kontaktu s osobama pozitivnim na COVID-19 ili su pod sumnjom da bi mogli biti izložena virusu ostaju kod kuće i roditelji ih ne smiju dovođiti u igraonice.

Trajanje aktivnosti u zatvorenom prostoru. Aktivnosti se moraju organizovati na način da budu vremenski skraćene koliko god je to moguće te da se obezbjedi fizičko distanciranje djece i zaposlenih kao i pojačana lična higijena i higijena prostora.

Raspored. Aktivnosti se smiju održavati samo u skladu sa rasporedom rada i sa zaposlenima koja su određena da rade taj dan. Preporuka je da za jednu grupu djece brine jedan zaposleni / animator, bez „preklapanja“.

Aktivnosti na otvorenom segment. Koliko je moguće, preporučuje se održavanje aktivnosti na otvorenom prostoru.

Dezinfekcija opreme. Nakon korištenja rekvizita i ostale opreme, po završetku aktivnosti sve je potrebno dezinficirati.

Pojačana higijena prostora

Provjetravanje prostora. Preporučuje se redovno provjetravati prostor najmanje dva puta dnevno u trajanju od minimalno pola sata prije i nakon pojedinih grupa, ili ako je moguće ostaviti otvoren prozor tokom trajanja aktivnosti.

Klima uređaji, uređaji za grijanje i ventilaciju. Pošta preporuka za unutrašnje prostore je provjetravanje otvaranjem prozora, a manje korišćenjem ventilacijskih sistema. Pri korišćenju ventilacijskih sistema posebnu pažnju treba posvetiti praćenju stanja filtera. Treba provjeriti pravilno funkcionisanje opreme za ventilaciju i izmjenu vazduha.

Čišćenje prostora. Često dodirivane površine kao što su ručke na vratima, ručke na prozorima, radne površine, rukohvati, slavine u toaletima, tipke vodokotlića, prekidači za struju, zvona na vratima, te druge dodirne površine koje koristi veći broj osoba neophodno je dezinficirati prijepočetka rada i između pojedinih grupa, a najmanje dvaput dnevno. U slučaju da igraonica/rođendaonica posluje i prima grupe djece tokom cijelog dana, preporučuje se oko sredine radnog vremena napraviti pauzu od sat vremena za dezinfekciju i čišćenje prostora u onim slučajevima kada je čitav dan/raspored popunjen grupama djece/korisnika.

